

Federalni ministar energije, rudarstva i industrije Nermin Džindić susreo se u sjedištu Vlade FBiH u Sarajevu sa ambasadorom Ujedinjenog Kraljevstva Velike Britanije i Sjeverne Irske u Bosni i Hercegovini Edwardom Fergusonom.

Glavna tema razgovora bila je izrada energetske strategije, na državnom i federalnom nivou, što je britanski ambasador podržao jer je to jedna od obaveza iz potpisanog Sporazuma o Energetskoj zajednici, čime se slijede smjernice energetske politike Evropske unije.

Ministar Džindić informirao je ambasadora Fergusonona da je na 51. sjednici Vlade Federacije BiH, na prijedlog Federalnog ministarstva energije, rudarstva i industrije, usvojen Projektni zadatak za izradu Energetske strategije Federacije BiH za period 2015.-2035. godina s projekcijom do 2050. godine. Istakao je da Strategija uključuje potpunu reformu energetske sektora s konačnim ciljem njegove izgradnje u skladu sa evropskim standardima. Projektni zadatak definiše osnovne elemente za izradu Energetske strategije na temelju analize postojećeg stanja, uz uvažavanje unutrašnjih i vanjskih faktora uticaja na energetske sektor FBiH. Ovaj postupak će biti proveden putem javne nabavke, odnosno odabirom konsultantske firme za izradu Strategije, što će, u skladu sa Zakonom o javnim nabavkama, realizirati ovo ministarstvo.

Posebno je naglasio da su utvrđene i procedure za izradu, razmatranje i usvajanje ovog strateškog dokumenta.

“U ovom procesu trebali bismo ići paralelno sa izradom strategije na državnom nivou jer su to dokumenti koji se „preklapaju“. Ona zapravo treba sadržavati osnovne smjernice za entitetske strategije i pokazati put kojim trebamo ići”, istakao je Džindić i upoznao britanskog diplomatu sa stepenom realizacije energetske projekata i planovima za budućnost.

Ambasador Ferguson je posebno naglasio da za određene energetske projekte u BiH postoji veliko interesovanje kompanija iz Velike Britanije.

izvor: aarhus.ba